

**DEKRETU GOVERNU N° 16/2017**  
**12 Maiu**

**REGULAMENTU KONA-BÁ APREZENTASAUN KANDIDATURA SIRA BA**  
**ELEISAUN DEPUTADU SIRA PARLAMENTU NASIONAL NIAN**

Lei eleitorál ba Parlamentu Nasional nian, tuir ne'ebé maka hatuur iha Konstituisaun Repúblika hateten katak, partidu polítiku sira, ida-idak ka iha koligasaun nia laran, bele prezenta lista kandidatu Deputadu sira ba Parlamentu Nasional ninian.

Tanba ne'e, norma jerais sira kona ba apresentasaun no admisaun kandidatura ba eleisaun deputadu ba Parlamentu Nasional ninian, tuir ne'ebé maka hatuur iha lei ne'ebé refere, tenke hetan definisaun ida ne'e detallada.

Ho ida ne'e, Governu dekreta, tuir saida maka hatuur iha artigu 77° husi Lei n° 6/2006, 28 Dezembru, altera tuituir malu husi Lei n° 6/2007, 31 Maiu, 7/2011, 22 Juñu, 1/2012, 13 Janeiro no n° 9/2017, 5 Maiu, atu hetan kbiit nudár regulamentu, sira tuir mai ne'e:

**Kapítulu I**  
**Dispozisaun Jerais Nian**

**Artigu 1°**  
**Ámbitu**

Regulamentu ida ne'e estabese norma sira kona-bá apresentasaun kandidatura ba eleisaun Deputadu sira Parlamentu Nasional na'in, nomos norma kontensiozas sira kona-bá faze ida ne'e ho prosesu sira eleitorais ida-idak.

**Kapítulu II**  
**Kandidatura no nia rekeztu sira**

**Artigu 2°**  
**Elementu Identifikasaun sira**

Ba regulamentu ida ne'e nian, konsidera sira tuir mai ne'e nudár elementu identifikasaun sira:

- a) Naran kompletu;
- b) Data moris;
- c) Filiasan;
- d) Profisaun;
- e) Naturalidade;
- f) Munisípiu, Postu Administrativu, Rejiaun Administrativa Espesiál Oekusi Ambeno, Suku no Aldeia hela-fatin;
- g) Número inskrisaun resenseamentu eleitorál nian.

### **Artigu 3º Inelijibilidade**

Sira tuir mai ne'e la bele eleitu ba tur iha Parlamentu Nasional:

- a) Prezidente Repúblika;
- b) Majistradu judisiál sira no Ministériu públika nian sira ne'ebé maka sei ativu hela iha sira nia knar;
- c) Diplomata karreira sira ne'ebé sei ativu hela iha sira nia knar;
- d) Membreu forsa de defeza Timor nian (FALINTIL-FDTL) ne'ebé sei ativu hela iha sira nia knar;
- e) Membreu polísia sira ne'ebé sei ativu hela iha sira knar;
- f) Ministru sira husi kualkér relijiaun ka kultu;
- g) Membreu Komisaun Nasional Eleisaun sira, tuir mai sei temi de'it naran CNE.

### **Artigu 4º Proponente sira nia representante sira**

1. Kuandu apresenta lista kandidatu sira, partidu polítiku no koligasaun partidária sira sei representa husi ema ne'ebé sira hatudu.
2. Hodi bele hato'o notifikasaun, tenke indika kedas representante sira nia hela fatin no kontaktu telefóniku iha prosesu kandidatura nian.

### **Kapítulu III Prosesu apresentasaun kandidatura Artigu 5º Podér hodi apresenta kandidatura**

1. Kandidatura sira sei apresenta husi partidu polítiku sira, ida-idak ka iha koligasaun ho partidu seluk, ne'ebé maka rejistadu ona, no iha lista mós bele tau hotu sidadaun sira ne'ebé maka la afilia ba partidu sira ne'e.
2. Partidu ka koligasaun partidária sira la bele apresenta lista kandidatu liu husi ida.
3. Labele iha kandidatu ida maka mosu iha lista liu husi ida, tanba halo nia sai inelijivel.
4. Iha momentu apresenta kandidatura, partidu polítiku ka koligasaun partidária sira, tenke hatudu prova katak sira kumpre duni saida maka hatuur iha n° 2 husi artigu 7º, artigu 18º no n° 2 ho 4 husi artigu 19 Lei n° 3/2004, 14 abril nian, kona ba partidu polítiku sira, no karik la kumpre sira nia kandidatura sei hetan rejeisaun.

### **Artigu 6º Koligasaun Partidária ba fins eleitorais**

1. Marka tiha data eleisaun nian, iha loron 20 (ruanulu) nia laran, partidu rua ka liu bele halo koligasaun ba fins eleitorais (koligasaun partidária) ho objetivu hodi apresenta lista únika ba eleisaun parlamentu nasional nian, tuir termu sira ne'ebé hatuur iha número sira tuir mai ne'e.
2. Halo koligasaun partidária ba fins eleitorais tenke obedese saida maka hatuur iha Lei Partidu Polítiku sira nian, komunika kedas ba CNE, ho temi ida-idak nia naran, sigla, bandeira no emblema.

3. Elementu sira ne'ebé temi iha número anterior tenke transmite kedas liu husi CNE ba Sekretáriadu Tékniku ba Administrasaun Eleitoral (STAE), ne'ebé sei divulga kedas liu husi Avizu ne'ebé publika iha Jornal Repúblika.

### **Artigu 7º**

#### **Fatin no Prazu ba apresentasaun nian**

Lista kandidatu sira sei apresenta ba Supremo Tribunal Justisa (STJ), iha prazu loron tolu nulu nia laran, konta husi data publikasaun iha Jornal Repúblika deketu ida ne'ebé maka marka data eleisaun nian.

### **Artigu 8º**

#### **Rekezitu sira ba apresentasaun kandidatura**

1. Apresentasaun kandidatura konsiste husi entrega deklarasaun konjunta aseitasaun nian ne'ebé subskrita husi kandidatu sira hotu, ordena no identifika ho loloos nudár kandidatu efetivu sira ka kandidatu suplente sira.
2. Iha deklarasaun ne'ebé maka temi iha número ida foin liu ba ne'e, kandidatu sira deklara katak aseita atu kandidata-an ba eleisaun deputadu sira Parlamentu Nasional nian, aseita kandidatura nia representante, no la afeta husi kualkér inelijibilidade ida no la kandidata-an tan husi lista partidu seluk ka koligasaun partidária sira seluk nian ruma.
3. Iha deklarasaun konjunta kandidatura nian ne'e, sei tau hotu iha ne'ebá elementu sira identifikaun husi kandidatu sira hotu-hotu inklui kandidatura nia representante rasik, no sei tau mós kandidatu hotu-hotu nia asinatura.
4. Lista husi kandidatu efetivu sira no suplente sira sei respeita regra ne'ebé prevee ona tuir lei katak tenke iha fetu ida ba kada kandidatu na'in tolu.
5. Iha lista ne'ebé koligasaun partidária sira apresenta sei iha indikasaun kona bá partidu ida ne'ebé maka propoin kada kandidatu.
6. Representante husi partidu polítiku ka koligasaun partidária sei apresenta dokumentu sira ba STJ, iha suporte papél ka eletróniku, kona bá lista kandidatura nian, atu nune'e bele halo verifikaun ba irregularidade sira ba prosesu no elijibilidade kandidatu sira nian.

### **Artigu 9º**

#### **Admisaun kandidatura sira**

1. Kuandu simu tia kandidatura sira ona, STJ, hahú kedas halo verifikaun ba irregularidade husi prosesu sira ne'e, autenticidade husi dokumentu sira no elijibilidade husi kandidatu sira, no ba ida ne'e, sei hetan apoiu husi STAE.
2. STAE sei halo verifikaun identifikaun no inskrisaun iha baze dados eleitoral iha prazu másimu loron 2 (rua).
3. Depois halo verifikaun lista, STAE sei hasai no hatutan ba STJ, áta verifikaun lista sira ne'ebé apta ba admisaun.
4. Sei rejeita kandidatu sira ne'ebé maka inelijíveis.
5. Karik verifika irregularidade prosesuais nian, sei notifika kedas representante kandidatura para kompleta iha prazu loron 2 (rua) nia laran.
6. Desizaun atu admite ka rejeita sei ható husi STJ, iha prazu loron 10 (sanulu) konta husi momentu ne'ebé prazu apresentasaun kandidatura nian termina ona, abranje ba

kandidatura hotu-hotu no sei notifika kedas ba sira nia representante sira, ba CNE nomos ba STAE.

### **Artigu 10° Publidade ba Desizaun**

Iha loron ne'ebé maka fó sai desizaun ne'ebé temi iha n° 6 husi artigu anterior, STJ sei taka desizaun ne'e iha nia edifísiu nia odamatan.

### **Artigu 11° Komunikasaun ba kandidatura sira ne'ebé admite ona**

1. Relasaun/informasaun husi kandidatura sira ne'ebé admitidu ona sei haruka kedas ba STAE.
2. STAE promove divulgasaun ba kandidatura sira ne'ebé admite ona, liu husi radio nasional no meiu komunikasaun sosiál sira hotu-hotu, durante loron 3 (tolu) tuituir malu.

### **Artigu 12° Sorteiu lista sira**

1. Loron ida tuir mai depois publika tia kandidatura sira ne'ebé admite loloos ona, presidente STJ sei halo sorteiu ba kandidatura sira iha kandidatu no sira nia representante sira ne'ebé mai partisipa iha sorteiu ne'e nia oin, atu nune'e bele atribui ba sira, orden boletin votu, no sei elabora mós áta ida ba ida ne'e.
2. Realizasaun sorteiu no impresaun boletin votu sei la implika admisaun ba kandidatura, no sei konsidera nudár laiha efeitu, liu-liu ba kandidatura sira ne'ebé maka rejeita ona definitivamente.
3. Rezultadu husi sorteiu sei taka iha edifísiu STJ nia odamatan, no sei haruka mós kópia ida ba CNE ho STAE.

### **Artigu 13° Substituisaun ka dezisténsia husi kandidatu sira**

1. Bele simu, karik kualkér kandidatu ruma hakarak dada-an sai husi lista, basta maka tenke halo liu husi deklarasaun ida ne'ebé nia rasik asina no rekoñese husi notáriu, no mezmú nune'e, lista ne'ebé apresenta vale nafatin.
2. Kandidatu ne'ebé hakarak dada-an, nia rasik tenke komunika ba nia partidu polítiku hodi bele informa CNE, ho kópia ida ba STAE.
3. Bele mós halo substituisaun ba kandidatu, too loron ruanulu-resin-ida antes eleisaun, iha kazu sira tuir mai ne'e:
  - a. Eliminaun tanba julgamentu definitivu husi rekursu ne'ebé bazeia ba inelijibilidade;
  - b. Kandidatu rasik dada-an ka halo dezisténsia.
4. Iha kazu ne'ebé maka kandidatu ne'e mate ka moras ne'ebé maka determina katak nia fízika ka psíkika labele duni ona, sei halo substituisaun ba nia too oras hitunulu-resin-rua antes eleisaun.
5. Substituisaun ne'e fakultativa, no substitutu sira sei mosu iha lista iha suplente ida ikus liu nia okos.

**Artigu 14°**  
**Dezisténsia husi lista rasik**

Bele simu, karik lista tomak sei dada-an sai ka deziste, too oras hitunulu-resin-rua husi loron eleisaun nian liu husi komunikasaun ne'ebé representante sei ható ba STJ, ne'ebé tuir mai sei transmite tutan ba CNE no ba STAE.

**Kapítulu IV**  
**Dispozisaun kona kontensiozu apresentasaun kandidatura nian**

**Artigu 15°**  
**Rekursu**

1. Ba desizaun ne'ebé maka foti kona bá apresentasaun kandidatura nian bele ható kedas rekursu ba STJ koletivu iha prazu loron 1 (ida) nia laran.
2. Rekerimentu atu ható rekursu, tenke apresenta fundamentu sira no akompaña kedas ho prova sira.
3. Desizaun kona ba rekursu ne'e sei hasai iha loron 2 (rua) nia laran, konta husi momentu ne'ebé prazu ida temi iha número 1 ne'e remata.
4. Sei haruka kedas kandidatu sira ne'ebé admitida loloos ona nia relasaun/informasaun ba CNE no STAE.

**Artigu 16°**  
**Lejitimidade**

Kandidatu sira, partidu polítiku sira, koligasaun partidária sira, representante kandidatura sira nomos eleitor sira iha lejitimidade atu apresenta rekursu.

**Artigu 17°**  
**Desizaun**

STJ maka deside loloos kona ba rekursu iha prazu oras 48 (haatnulu-resin-ualu) nia laran konta husi data ne'ebé simu auto sira ne'e, no sei komunika desizaun ne'e, iha loron ne'e duni, ba entidade ne'ebé maka husu rekursu,ba CNE no mós ba STAE.

**Kapítulu V**  
**Dispozisaun finais sira no tranzitóriu**

**Artigu 18°**  
**Kontajen no prazu sira nia termu**

1. Prazu sira ne'ebé maka prevee ona iha regulamentu ida ne'e sei continua nafatin.
2. Kuandu kualkér atu ne'ebé temi iha regulamentu ida ne'e envolve intervensaun husi entidade ka servisu públiku sira, sei konsidera katak prazu ne'e remata kuandu oráriu expediente husi servisu públiku sira ne'e remata ona.

**Artigu 19°**  
**Tribunal kompetente**

Enkuantu STJ seidauk hahú hala'o nia knar, kompeténsia sira ne'ebé maka nia hetan husi regulamentu ida ne'e sei ejerse husi Tribunal Rekursu.

**Artigu 20°**  
**Kazu omisu sira**

Kazu omisu sira (ka kazu sira ne'ebé la prevee iha lei ida ne'e) sei rezolve tuir lejislasaun ne'ebé bele aplika ka konforme prinsipiu jerais sira direitu nian.

**Artigu 21°**  
**Formuláriu apresentasaun kandidatura nian**

1. Kandidatura sira hotu-hotu sei apresenta liu husi prienxe formuláriu deklarasaun konjunta aseitasaun kandidatura nian, ne'ebé akompaña mós ho dokumentu sira ne'ebé prevee ona iha dekretu ida ne'e, perante STJ
2. Formuláriu ne'ebé maka temi iha número anterior, tau iha anexu I husi diploma ida ne'e ninian, nudár parte integrante ba efeitu sira legais hotu-hotu

**Artigu 22°**  
**Entrada en vigor**

Regulamentu ida ne'e sei hahú vigora iha loron ida tuir mai hafoin loron ne'ebé halo publikasaun iha Jornal Repúblika.

Aprova iha Konsellu Ministru iha 11 maiu 2017.

Ba publika.

Primeiru Ministru,  
**Dr. Rui Maria de Araújo**

Ministru Administrasaun Estatál,  
**Dionisio Babo Soares, PhD**